

起東方直指西方黑雲起東方指坤方○己卯三覆死囚許積陳李堂揆雖是儒雅之人留意國事頗有誠實之稱外議謂宜仍任北伯而交代既出自下不敢直請催送嶺南新方伯使之趁速相替上命李堂揆朴信圭並仍任蓋堂揆以北伯移拜憲長信圭又以嶺伯移拜北伯故積言如此○庚辰以閔黯為大司憲元稅為掌令俞夏謙金澍為正言李后定為副修撰○辛巳流星出星星上入東方○甲申流星出王良星上入乾方出氐星下入巽方○乙酉流星出參星下入巽方出北極星下入艮方○丁亥流星出天中淡雲間入南方○以睦林儒為司諫俞夏謙為獻納趙祉錫為正言李袞為禮曹判書李玄錫為修撰李玄紀為檢閱○趙絅之孫生負九輅上疏曰去年李台瑞欲雪其父就仁之累謂臣祖挽就仁詩中有如金如玉等語相臣至達於前席厥後更陳爽實之狀矣聞頃日儒臣又以台瑞不可廢棄之意建白曰趙絅鮮許可而乃於就仁謂之如金如玉則其無累可見云臣嘗在側親聞則祖父嘗曰就仁為人不可對面豈以金玉等語形諸文字乎台瑞急於伸其父而借重臣祖做出衡言也疏下刑曹○戊子夜東方有氣如火光○己丑流星出北斗星下入北方○引見大臣備局諸臣許積袖出北兵使柳斐然之抵訓將柳赫然私書而讀

